

1.			序幕 – 照顧機械1
2.			( 演出開始前五分鐘， 觀眾仍然入座， 演員逐一到台， 入去一個類似癌病照顧者支援小組。他們不互相認識， 所以不會互相打招呼。演員各散在台上。  劇院宣布完畢後， 演出正適開始。支援小組“主持人” VO。)
3.	主持人 (VO)		Hello， 大家好， 好多謝大家抽空嚟到我地嘅癌病照顧者支援中心， 歡迎大家嚟到我地彌補心路程呢個癌病照顧者支援小組， 不如我地先圍一個圈， 大家自我介紹先。(演員起身圍圈) 我地由左邊呢位小姐開始。
4.	Jenny		你好， 我叫Jenny， 我嘅燕梳公司到做野。
5.	Eva		我叫Eva， 我結婚後同丈夫搬去紐約到底住。
6.	Paul		大家好， 我叫阿Paul， 我係做廣告。
7.	Stephen		Hi， 我叫Stephen， 我係玩音樂。
8.	萍		我叫阿萍， 我係做酒店業。
9.	Jack		大家好， 我叫阿Jack， 我而家做緊 part time， 我啱啱副學士畢業。
10.	主持人 (VO)		好。好多謝大家今日嚟呢度分享你地照顧嘅經驗， 等我地可以見證一下你嘅故事同經過， 希望我地可以透過分享故事次中而學習， 或者更加了解我地自己嘅經過。不如首先， 我地大家分享吓你對照顧有乜野體會， 你認為照顧嘅定義係乜野呢？(音樂， LFX)
11.			( 演員說話時逐一說話時走到位置， 做無形照顧動作， 形成照顧機械 1。當演員說出”照顧是……”， 投影同時出同一句說話。)
12.	Stephen		照顧係光榮嘅任務。
13.	Jenny		照顧係真愛嘅見證。
14.	Eva		照顧係放低自我。
15.	Jack		照顧係作出決定、聆聽他人、解決問題。
16.	Paul		照顧係一度橋樑、一位救火員、一名打雜。
17.	Lucille		照顧係永遠做得不夠。

20140927

18.	主持人 (VO)		咁當你知道你最親嘅患癌病時，你有乜野反應？ (LFX，音樂出)
19.			<b>ACT 1 – 當癌病突然出現時</b>
20.	投影		當癌病突然出現時 (演員定格。每人說話時身體放下定格，反點中立)
21.	2A	W	(望觀眾) 好突然
22.	2B	E	情天霹靂 (演員呈現定格 # 1。一刻)
23.	2C	P	(望觀眾) 唔夠資訊
24.	2D	L	(望觀眾) 好多誤解
25.	2E	K	(望觀眾) 難以決擇 (演員呈現定格 # 2。一刻)
26.	2F	D	(望觀眾) 自欺欺人
27.	2G	L	(望觀眾) 隱瞞 (演員呈現定格 # 3，一刻。出，音樂 fade out.)
28.			<b>Scene 1.1 – Amy 電郵</b>
29.	Eva	W	(在台右，Eva 及丈夫在車子內，丈夫駕駛，坐在左邊，因他們在外國。Eva 看手機中的電郵) 咦，奇怪。
30.	Eva 夫	P	咩事？
31.	Eva		我 girlfriend Amy send email 俾我話：“我流鼻血及身上紅疹兩星期都未清，有醫生朋友建議回香港做檢查，他大概是小題大做，點都好，我下星期會自己一人回港，仔女留在東京，我無話俾老公知，費事佢擔心。”
32.	Eva 夫		流鼻血？
33.	Eva		“好期望下個月你回港，到時我們可以一齊 shopping。”
34.	Eva 丈夫		佢係咪話流鼻血流咗兩星期？
35.	Eva		嗯。
36.	Eva 丈夫		老婆，我睇唔係幾妥，你記唔記得，我阿爸都係咁開始，點知係鼻咽癌。
37.	Eva		吓？
38.	Eva 丈夫		我諗你唔好等下個月，你即刻番香港睇吓佢。
39.	Eva		鼻咽癌？佢唔食煙，又唔係同食煙嘅人住，

20140927

			點會有鼻咽癌？
40.	Eva 丈夫		唔係食煙嘅人先患鼻咽癌。你知嗎，南中國嘅鼻咽癌 case 係全世界最高。你個 friend 番香港驗咪好囉，喺日本，佢地可能連鼻咽癌係咩都唔知。
41.			<b>Scene 1.2 – Paul 媽生 cancer</b>
42.	Paul	E	(Paul 父已進在台左，從窗口望出，Paul 入) 爸？我嚟咗，你搵我？做咩事？(父確認兒子的到達，繼續定望窗口，不動。) 你無咩事咁嘛？(一刻。Paul 開始煩躁) 爸，我頭先開緊會，你唔出聲咁我走。(開始轉身走，父向子說)
43.	Paul 父	K	你阿媽生 cancer。
44.	Paul		咩話？你話咩話？你想我嚟，我而家嚟咗。(父不回答) 我應承你星期六日多啲過嚟。(爸) 不如咁啦，下星期我地一齊去食 buffet，好嗎？你鍾意去 Marriot 定 Grand Hyatt? (取出電話想打)
45.	父		你阿媽生 CANCER！！
46.	Paul		我唔信...
47.	父		阿 Paul，係真，仲係末期。(二人出，珊入，在聽電話，等對方接，到自己工作位坐下)
48.			<b>Scene 1.3 – 阿珊 book 化療</b>
49.	珊	L	(珊一邊上網搜集資料，一邊聽電話) 咁多講大腸癌嘅 website，睇邊個先啱？(同事 1 入)
50.	同事 1	D	阿珊，我有啲關於大腸癌嘅小冊子，我表姨都係大腸癌，呢啲係我表哥俾我，我俾你睇吓。我去做野先。(放下一大堆小冊子)
51.	珊		哦，唔該晒。(同事 1 出。同事 2 入，珊向電話) 喂？係呀，我仲 hold 緊，我想同我阿媽 confirm 佢幾時做第一次做化療…… 佢叫陳曉蘭…… 好，我等。
52.	同事 2	W	阿珊，你阿媽做化療？做化療好傷身㗎，仲好辛苦添。(拿卡片) 我呢度有個中醫，好有料到，我阿爺都係睇佢。仲有，呢個係氣功師傅嚟㗎，你搵佢地啦。我出去做野。(出)

20140927

53.	珊		唔該。(一刻。向電話) 喂，係呀我仲 hold 緊…… 係…… errr…… 我想問吓…… 我阿媽可唔可以遲啲先做化療？我地想試吓睇中醫先…… 我遲啲再覆你。(收線)
54.	同事 3	E	(同事 3 剛行過) 阿珊，你唔係諗住唔同你阿媽做化療咩嘍？
55.	珊		我諗，或者我阿媽可以試吓中醫先，化療咁傷身，又咁辛苦。
56.	同事 3		阿珊，呢啲野你要同你阿媽個醫生傾。化療係好傷身，但係中醫未必醫得好，你要諗清楚。(出)
57.	珊		咁點做好？化療咁辛苦…… 應該點揀？
58.			<b>Scene 1.4 – Jack 獨白 1</b>
59.	Jack	P	(音樂) 點解一個女仔有血癌，但係都可以咁開心，笑得咁靚？我好想去保護佢。我未識之前已經知道佢有病，係睇完佢 website 之後知。跟住我都好坦白咁同佢講，上咗你個網睇，知道你有事。佢話：唔好同其他人講。佢用化妝品去 cum 住塊面嘅面色，嗰種黑係黑得好緊要，嗰種面色係 cum 唔到，你係睇得出，唔係曬黑嗰隻暗，係好黑好暗啞嗰隻，無晒光澤。我見到好心痛。我識佢嗰時係冬天，著長袖嘅。我記得佢有次要擺野，伸起隻手，件衫袖滑咗落嚟，睇到佢手腕瘦到...嗰時係真係好心痛，嗰種感覺係...你係唔敢睇... (音樂 fade out)
60.			<b>Scene 1.5 – 番香港</b>
61.			(Stephen 兄妹三人在醫院等候醫生來報告父手術的情況，父仍然昏迷，醫生入，兄妹立刻起來)
62.	Stephen		我阿爸點啊？
63.	醫生		好抱歉，你阿爸個腫瘤太大個，割唔到。
64.	Stephen		仲有幾多時間？
65.	醫生		一個月，或者兩個。(Susan 開始哭，Stephen 安慰) 你將唔將件事話俾佢知，你地自己決定。好抱歉。(出)
66.	Stephen		最起碼我哋知道佢嘅情況。
67.	Sally		我哋唔好話俾佢知，會影響佢康復。
68.	Stephen		但係佢需要知道真相，萬一有啲乜嘢佢想

20140927

			做。
69.	Susan		我哋點算好？
70.	Stephen		(Sally 及 Susan 到父身邊，開始哭出來，Stephen 向自己) 我唔想無埋你。(開始哭出來。不久，父醒過來，姊妹們很忙錄地為弄舒服、給毛毯飲料等工夫。父終於揮手叫停，向 Stephen 伸手，Stephen 到父身旁握著手，決定性地說) 爸，醫生話盡晒力。
71.	父		嗯。
72.	Stephen		醫生話仲有幾個月嘅時間。
73.	父		(想一會，一刻) 阿仔，我想返香港。
74.	Stephen		哦。咁我問吓醫生你可唔可以飛。(離開床邊，向觀眾) 我哋十日之後就返到香港。架飛機掂到跑道，阿爸/媽心情即刻好好多，返香港呢個決定，將佢自己壽命延長咗一年。(音樂)

20140927

75.			<b>ACT 2 - 傳統觀念傳統行為</b>
76.	投影		傳統觀念傳統行為 (演員入, 個別向觀眾說出心中說話)
77.	2A.1	W	唔可以講得俾佢聽㗎
78.	2B.1	D	唔好話俾人知
79.	2C.1	E	唔俾得佢知㗎
80.	2D.1	K	唔好講
81.	2E.1	L	唔好話佢知呀
82.	2F.1	P	Shh...
83.	2A.2	W	我唔可以 lum㗎
84.	2B.2	D	我要忍
85.	2C.2	E	堅強啲
86.	2D.2	K	死撐
87.	2E.2	L	我唔可以喺佢面前喊
88.	2F.2	P	頂住呀
89.	2A.3	W	我唔想佢擔心太多
90.	2B.3	D	唔駛擔心, 無事嘅
91.	2C.3	E	放心啦, 無野嘅
92.	2D.3	K	佢唔會有事嘅
93.	2E.3	L	唔好講, 費事佢擔心啦
94.	2F.3	P	唔駛擔心㗎 (Music cue fades out.)
95.			<b>Scene 2.1 – Jenny 趕番工</b>
96.	Jenny	D	(Jenny 趕上班, 已遲到, 走過父睡房時想知道究竟父是否熟睡, 在門口聆聽一會, 想進入但猶豫, 終於決定推開門隙看看, 見父是醒的, 很不舒服, Jenny 入房。) 爸, 你沉晚有無瞓過?
97.	爸	P	瞓唔著, 好唔舒服。
98.	Jenny		(Jenny 拿兩張椅入, 放在一邊後到父身邊請他坐) 爸, 你坐啦。你又坐天光?
99.	爸		(坐低後) 其實我都唔想面對我呢個病。
100.	Jenny		(用手抓緊爸的手) 爸, 唔駛驚, 你也都唔駛驚。(爸擔憂中) 爸爸, 如果你想喊, 就喊出嚟啦, 唔緊要架。

20140927

101.	爸		我無野。
102.	Jenny		我知道你好擔心，你要喊，我地一齊喊。
103.	爸		(發火) 我都話無野。(一刻) 真係好驚... 你都係咩都唔駛同我講喇。
104.	Jenny		你唔想知，我地就唔講。
105.			<b>Scene 2.2 – 買中藥</b>
106.	萍		(與兄走到中藥店) 呢，喺嗰邊，係呢間。 (向店員) 唔該執藥。(在等待中) 一陣仲要去街市買餸煲湯。
107.	忠		咁唔駛番去治療師到接阿妹咩？
108.	萍		佢話自己搭巴士啲。
109.	忠		吓？得唔得啲？佢唔痛嘅咩？
110.	萍		你知佢啲啦，鬼咁獨立，乜都要自己嚟，搵醫生，約醫生...我都係陪佢去呢度去嗰度，做完手術之後，幫吓佢沖涼，我都無幫過佢啲乜野。佢從來都唔出聲叫我幫手嘅，如果今日唔係話你唔駛番工，佢實唔俾你車佢去覆診。唉，我都唔知點幫佢。
111.	忠		佢咁獨立，你咪插手添，費事佢唔鍾意。
112.	萍		我諗，佢當初連講都唔想講俾我地知。
113.	忠		係，唔係咩？
114.	萍		係呀，我諗唔想我地擔心。而家又叫我地應承佢唔好話俾阿爸阿媽知。
115.	忠		呢啲野，瞞得幾耐咩？每次佢太辛苦唔番嚟食飯，又要呢多次。
116.	萍		有時都唔知同佢講咩好。
117.	忠		唔好當佢有病，好似乎時咁，當無事。唔好喺佢面前拉長塊面。唔好俾佢知我地擔心，要積極啲，鼓勵佢，無言支持。
118.	萍		你講就容易。
119.			唯有係咁。
120.	萍		有時睇見佢咁痛，又甩頭髮，又割淋巴，又水腫...佢咁辛苦，我可以做啲乜野？我覺得好無助。
121.	忠		根本無人可以話到俾你聽應該點做。
122.	萍		仲有，阿爸阿媽.....佢地要知，萬一.....

20140927

123.	忠		其實我都驚阿爸阿媽受唔住。
124.	萍		咁.....
125.	忠		見步行步啦。
126.			<b>Scene 2.3 – Paul 母番發</b>
127.			(在以上的場未完時 Paul 父入，站在台的另一邊，毫無目標地望出去，有如上一場一樣，他明顯在擔心某事，拿起電話電兒子，但電話飛去留言信箱〔SFX Paul 留言訊息〕，他猶豫留言，正想說話時，Paul 母拿著私人物件入，準備執行李包)
128.	Paul 母	L	我都知道弊嘅啦，呢啲病一復發就無乜機會好返。
129.	Paul 父	K	(在幫太太收拾行李) 醫生都安排咗化療就唔好諗咁多啦。
130.	Paul 母		化療真係好辛苦，又咀爛，又甩頭髮，又食唔到野...
131.	Paul 父		唔好擔心咁多啦，準備一下就要去醫院啦。
132.	Paul 母		好啦，等我去洗頭沖涼先。
133.	Paul 父		咁我同你執埋啲野。
134.	Paul 母		唔好講咁多野比個仔知，費事佢擔心。
135.	Paul 父		得嘅啦。(母出，去廁所。父的手提電話響) 喂？
136.	Paul	E	(在台的另一邊) 喂，阿爸？你頭先打嚟的做緊野聽唔到電話
137.	Paul 父		Er... 無野... 無事喇。
138.	Paul		哦，好啦。咁阿媽點？
139.	Paul 父		佢無事。
140.	Paul		佢今日覆診嘞，醫生點講？
141.	Paul 父		醫生話...佢好好。
142.	Paul		真嘅？
143.	Paul 父		係...佢無事，你唔駛擔心。
144.	Paul		咁真係好，俾我同佢講幾句。
145.	Paul 父		佢沖緊涼，我叫佢一陣覆你。
146.	Paul		好。係咁先，拜拜。
147.	Paul 父		拜拜。(想一想自己剛說的大話。)



20140927

148.			<b>Scene 2.4 – Jenny 打電話</b>
149.	Jenny	D	(好明顯剛哭完，打電話) 喂？細佬？係家姐...你快啲番嚟啦...阿爸今日情況好差...佢好辛苦...你番嚟見吓佢啦...你同佢講，話好錫佢，以前啲野，算數啦...我知...我知係好難忘記嘅，但係...佢係我地阿爸嚟㗎，我地得一個阿爸。佢病得好緊要，你剩係同佢講好錫佢，佢以前做過啲乜野都好，話佢知你原諒佢...時間無多，你地需要互相原諒...要快啲。

150.			<b>ACT 3 - 行動式照顧</b>
151.	投影		行動式照顧
152.			(音樂。LFX。演員在台上獨立做默劇代表一種照顧上的行動，每人都說一句對白。演員扮演非特定的照顧者)
153.		W	幾多錢呀？
154.		D	點呀，凍唔凍？
155.		E	就開得飯。
156.		K	係喇，遞高啲隻手，慢慢。
157.		L	我諗呢啲奇異果會啱佢食。
158.		P	我幫你帶上安全帶。
159.			(眾演員移到新位置，做另一段默劇，講另一句對白)
160.		W	夠鐘食藥喇，乖啦。
161.		D	覆診？我嗰日唔得閒啫...
162.		E	嚟啦，食唔落都食啲啦。
163.		K	唉，又嘔晒出嚟，得個洗字。
164.		L	我知你好痛，忍吓啦，醫生就快嚟。
165.		P	乜咁快又到期？
166.			(LFX，音樂 fade out.)
167.			<b>Scene 3.1 – 雞仔餅</b>
168.	萍	L	(敲門聲，萍開門，忠拿行李及妹入。) 阿妹，你番嚟喇。
169.	妹	D	大家姐。
170.	忠	E	好聲行。
171.	萍		你搬番來住就好喇，方便我地照顧你，又可以照顧你囡囡。
172.	妹		囡囡去咗邊？
173.	萍		阿爸阿媽帶咗佢去公園。你放心喺度休息，唔駛擔心。
174.	忠		肚唔肚餓？(妹點頭)
175.	萍		粥未煮好啫!
176.	忠		不如食啲芝士先，你鍾意食，又營養好、容易吞。(哥入廚房)

20140927

177.	萍		有冇唔舒服？傷口痛唔痛。
178.	妹		我好劫。（哥拿芝士入，妹將芝士搥成小片）
179.	忠		咁細塊？
180.	妹		太大片落唔到嚟。
181.	萍		你慢慢食，我入廚房睇吓啲粥。（萍向夫示意入廚房）佢越來越瘦，兩邊面頰都凹晒，又好多嘢都食唔到，我真係好擔心。
182.	忠		你千祈唔好喺佢面前話佢瘦咗，唔好成日提住佢有病，仲有，唔好喺阿爸阿媽面前講。而家阿妹搬番嚟住，我地要好好地照顧佢，如果有乜野想食就買俾佢食。佢有咩嘢心願，我哋就盡量幫佢實現。
183.	萍		唉，佢咁樣我真係有啲驚...（想繼續講但夫示意不要多講）
184.	忠		唔好再講。無事嘅，一定大步“攬”過。（二人回妹旁，卻發現妹沒有食芝士）咦，你有食到芝士？
185.	妹		食唔落。
186.	萍		咁你想食啲乜野？
187.	妹		（想片刻，很開心地）我想食雞仔餅。
188.	萍		（驚訝地）雞仔餅？
189.	忠		屋企有，我去攤。（出）
190.	萍		屋企啲啲好舊，唔好食。
191.	忠		（VO）食少少唔怕。（拿雞仔餅入）阿妹，食住呢啲先，聽日我揸車去灣仔買。（她好開心地吃）
192.	萍		你食得好開心。
193.	妹		好好食。（不久，開始不舒服，就地嘔出來，萍和丈夫忙著拿東西幫手抹）
194.	萍		你無事咩？
195.	妹		唔好意思。
196.	萍		你連芝士都食唔落，點解會想到食雞仔餅？
197.	妹		我不扭都好鍾意食雞仔餅，之前要戒口，唔敢食。而家唔食，可能再有機會。嘔好辛苦，值得嘅，而家真係死而無憾。（一刻）我好劫，我番入房先。（出，忠及萍望著妹

20140927

			出)
198.	萍		(一刻後，向忠) 你聽日買多啲番嚟俾佢食。(忠點頭同意)
199.			<b>Scene 3.2 – Jack 獨白 2 BBQ</b>
200.	Jack	P	(音樂。在台中) 記得佢有次我地一班 friend 去燒野食...去城門水塘，搭的士上到去，仲要行成四五個字先入到去。以佢嘅步速，其實佢就未必支撐到嘅。佢跟唔到大隊好唔開心，咁我就拿拿淋標出去睇下有啲咩野可以氹到佢開心啦，咁就買左條扎頭髮嘅橡根俾佢，上面有隻熊仔嘅，但係我無諗過呢樣野係諷刺緊佢嘅。佢都無頭髮。(出)
201.			<b>Scene 3.3 – 真空煲/換尿片 1</b>
202.	Stephen	K	阿爸咗香港九個月，其實係好好，不過佢身體同精神慢慢差，越來越唔可以自己照顧自己，不過佢仲可以行來行去，咁咪嘗試做家長嘅職責。有一次，我哋買咗一個真空煲，佢想幫手煲湯，佢好開心。
203.	父		(入) 仲有一個鐘煲湯就煲好喇喇。
204.	Stephen		哦。(Sally 入，大家一齊坐下來看電視或做自己東西。突然，Stephen 聞到異味) 乜野味？(Sally 跑去觀眾看不見的廚房)
205.	Sally		(OS) 哎呀，弊喇，阿爸將個真空煲擺上爐頭到煲湯。(Stephen 及 Susan 跑出去廚房)
206.	Stephen		(OS) 快啲熄火啦。
207.	Sally		(OS) 差啲著火，好臭。(Sally 及 Susan 繼續在廚房忙於清潔，即興對話，Stephen 入，見到一個被擊敗的父出)
208.	Stephen		(向觀眾) 一刻之間我地交換角色，阿爸再唔可以照顧自己，我地幾兄妹正適變成佢嘅照顧者。  (Sally 及父入，父坐在梳化上，Sally 出廚房去拿一杯茶) 真空煲嗰件事已經過咗兩個禮拜，阿爸將屋企所有工夫都捨棄俾我地。
209.	Sally		(Sally 拿一杯茶入，向父) 爸，飲杯茶，小心熱。(眾人看電視)
210.	Stephen		(Stephen 看電視但常常監視父。一刻，Stephen 看到深色液體將梳化浸透，快要流到坐在父旁的 Sally。向 Sally) 阿妹，小心。 (Stephen 及 Sally 跳起來，大家對望一刻，

20140927

			大家都震驚。Stephen 碼上離開，估計是去拿一條尿布，但其實是去到屋的另一角落，遠離 Sally 及父。觀眾仍見到 Stephen 在慌失失中。同時...)
211.	Sally		爸，唔駛驚，無事無事，我同你入去換衫。 (Sally 與父出。Stephen 安靜下來後反回客廳 Sally 再入，手拿布) 我以為你去攞尿片添。
212.	Stephen		我突然間好驚。
213.	Sally		咁你諗吓阿爸有乜野感受。(出)
214.	Stephen		(向觀眾) 其實我哋冇乜嘢理由咁驚，都預咗會有呢一日。嗰日所發生嘅事，令我呢一世都好內疚，好討厭我自己。我唔識換尿片，每次換我都令到阿爸/媽好唔舒服，我真係好無用，細妹好好手勢，又溫柔又體貼，我換尿片從來都俾唔到咁嘅感覺。
215.			<b>Scene 3.4 - 珊買假髮</b>
216.	珊	L	(又在工作中，她正閱讀醫院單，明顯很煩惱，同事 2 入時珊在自言自語) 化療四萬五千六百二十，住院八千五百五十.....
217.	同事 2	W	咦，阿珊，睇乜野睇到入晒神？
218.	珊		無野。搵我有事？
219.	同事 2		你問我用真頭髮做嘅假髮喺邊度買，噏，你去呢度買。(遞卡片)
220.	珊		唔該晒，你知唔知大概幾錢一個？
221.	同事 2		最基本四千蚊倒。
222.	珊		四千蚊？
223.	同事 2		係呀，真人頭髮做嘅係好貴，你可以買人做纖維嘅，不過嗰啲好醜樣，你知啦。我出去先。(出)
224.	珊		唔該。四千？(回看醫院單)
225.			<b>Scene 3.5 - Jenny 及母親分工</b>
226.	Jenny	D	(醫院中。Jenny 因父剛嘔吐，幫父清潔，媽媽手拿午飯剛來到醫) 媽，你咁早嘅？唔瞓晏啲先？
227.	Jenny 媽	W	你要番工咩嘛，咪早啲嚟囉。你阿爸點？食咗早餐未？
228.	Jenny		佢食唔到野咁，仲有嘔添。醫生話阿爸個病唔係控制得幾好，佢會有啲痛。

20140927

229.	Jenny 媽		不如你問下醫生有冇啲止嘔藥食咗之後會舒服啲呢？
230.	Jenny		哦，我去問吓醫生，你睇住佢先。（出病房，向護士）姑娘，我阿爸今日食唔到野又有嘔，想問下醫生有冇一啲藥，等佢食咗舒服少少？
231.	Jenny 爸	P	好辛苦...好辛苦呀。
232.	Jenny 媽		點呀？好辛苦？食少少野吖。
233.	Jenny 爸		乜都唔想食。你哋如果想講我個病情啲啲嘢就行出去，我唔想聽到。
234.	Jenny 媽		無野。（Jenny 回病房）咁醫生開啲乜嘢藥我哋都要知吖嘛。醫生都話你已經好緊，好快就有事架啦。
235.	Jenny 爸		啲藥都有用咁嘅？成日都仲係好痛，仲有嘔。
236.	Jenny 媽		醫生都話正常嘅，係咪阿女？
237.	Jenny		係呀。頭先我問咗姑娘，佢話醫生會開啲止嘔藥俾你，你食咗會好啲。一陣間我買啲野俾你食。
238.	Jenny 爸		唔好同我講個食字。好辛苦呀。
239.	Jenny 媽		唔食野點會有力講嘢，點會好番呢？
240.	Jenny 爸		咁食唔到點食啫？
241.	Jenny		食你平時最鍾意食嘅嘢啦，一陣我放工出去買你最鍾意食嘅嘢俾你，擺喺度，你有胃口嗰陣時就來食啦。
242.	Jenny 爸		乜都唔想食。
243.	Jenny 媽		老陳問你，幾時得閒出來飲茶㗎。我同佢講，你喺醫院好俾心機休息，好俾心機食藥，好快就出院可以同佢飲茶打麻雀架啦。
244.	Jenny 爸		你同佢講我入咗醫院？
245.	Jenny 媽		佢都係關心你啫。
246.	Jenny		（有電話入，看電話）公司 call 我。
247.	Jenny 爸		你去做野啦。
248.	Jenny 媽		咁你返工先啦。
249.	Jenny		咁我返工先喇，你睇住佢，我放工再過嚟。 （Jenny 離開病房）喂喂喂？係呀。我依家返緊嚟喇...（出）

250.	Jenny 媽		點呀，真係唔食啲野先？（爸搖頭）咁你瞓吓先啦，一陣間醫生攞啲藥入嚟我先叫你起身食啦。
251.	Jenny 爸		好驚。
252.	Jenny 媽		唔駛驚。啲子女都咁大，唔使驚架喇，知唔知？
253.	Jenny 爸		我知係我累事。
254.	Jenny 媽		啲啲野唔好諗啦，聽醫生講，聽我講。
255.	Jenny 爸		應該好快出得院。
256.	Jenny 媽		梗係啦。
257.	Jenny 爸		周身唔舒服，又瞓唔著。
258.	Jenny 媽		我同你按摩吓好唔好？乖啦，想快啲出院就要乖啦。
259.	Jenny 爸		究竟幾時出得院啫？
260.	Jenny 媽		醫生話好快，好快就會出院架啦，做多一次化療，如果有乜嘢反應，咁就可以出院。
261.	Jenny 爸		你就講得容易，做化療嗰個唔係你，辛苦嗰個係我。
262.	Jenny 媽		嚟啦，我同你按摩下啦。

20140927

263.			ACT 4 – 我覺得……
264.	投影		我覺得……
265.			(Music fade in。演員反回 ACT 3 的位置，做同一套默劇，但講一句新的對白)
266.	5A.1	W	好奷。
267.	5B.1	D	好驚。
268.	5C.1	E	好矛盾。
269.	5D.1	K	好無助。
270.	5E.1	L	好內疚。
271.	5F.1	P	好重負擔。
272.			Scene 4.1 – Paul 母昏迷
273.	Paul 父	K	(Paul 母在醫院床上睡著，Paul 在床邊堅守，父入病房) 有無醒過？(Paul 搖頭) 唉，去到呢個地部… (靜) 應該時間無多。
274.	Paul	E	點解你唔同我講佢情況咁差？
275.	Paul 父		佢唔想我講你知。
276.	Paul		你應該講俾我知，或者我可以陪佢多啲。
277.	Paul 父		佢唔想你擔心。
278.	Paul		真係癡話。擔心係我應該做嘍，我係佢嘅仔。
279.	Paul 父		唔好講。
280.	Paul		點解啲醫生又唔講你知？點解佢地唔話我地知，當佢好痛嘅時候，要打嗎啡，咁佢就會昏迷，昏迷之後就無機會講野？我仲有好多野想同佢講，而家太遲。
281.	Paul 父		Shhhh… 細聲啲。
282.	Paul		我應該做啲野。佢咁辛苦，唔通你睇唔到咩？但係佢成日都話，“我無事，唔駛擔心。”我知佢好驚，但係又唔肯出聲，我應該幫佢，而家太遲。
283.	Paul 父		你阿媽唔想你…
284.	Paul		我知我知，佢唔想我擔心，我係佢個仔，我係應該擔心，呢啲係我應該做，無論你地講乜野都好，我都會擔心。你應該話我知佢番發。
285.	Paul 父		當時我真係唔知點做。



20140927

286.	Paul		我都唔知應該點做。
<b>287.</b>			<b>Scene 4.2 - Eva 住院四天</b>
288.			(Eva 丈夫在車內等她，Eva 拿小行李入，跳入車子，丈夫開車)
289.	Eva 夫	P	乜嗎？(她開始哭起來) 做咩？你無事咩嘛？
290.	Eva	W	Amy 真係慘。
291.	Eva 夫		佢點呀？
292.	Eva		佢好驚，我又唔知點先幫到佢。佢好擔心兩個細路會無咗媽媽，佢個細女得兩個月大，我又係佢個仔嘅契媽……
293.	Eva 夫		唔係咁嚴重，係嘛？
294.	Eva		佢話，“Eva，你從來都唔想要細路哥，但係你而家可能要做人阿媽。”我都唔知做人地契媽要點... (大哭起上來) 佢可能會死。
295.	Eva 夫		(他將車停止下來) 嚟啦咪咁啦...佢唔會死嘅。
296.	Eva		我喺醫院陪佢咁多日我都唔敢喊出嚟，四日呀！我都唔知同邊個講好... 佢地又因為我唔係佢屋企人，乜都唔肯話俾我知。(突然發覺) 我連佢係第幾期都唔知，我陪咗佢四日都唔無問佢，我唔敢問，問唔出口。
297.	Eva 夫		其實點解佢要你去醫院陪佢？佢屋企人呢？
298.	Eva		佢老公要睇住兩個細路哥，佢阿媽喺加拿大，佢剩係得我一個... 佢話唔要屋企人，佢要我去照顧佢，我點可以唔去。嘩，瞓咗個張梳化椅四晚而家周身骨痛，啲護士朝早六點就量血壓，根本無一教好瞓。(檢查自己) 我真係要沖個涼。
299.	Eva 夫		(開車) 就番到屋企，好快就可以沖番個靚涼，瞓番教好嘅。
300.	Eva		我聽日要番去。我唔可以留低佢一個人喺醫院。
<b>301.</b>			<b>Scene 4.3 – 萍獨白</b>
302.	萍	L	我地屋企無諗過阿妹會復發，乜野心理準備都無。佢咁辛苦捱咗八九個月嘅療程，以為會好番，仲番埋工添，點知幾個星期後佢又病，醫生仲話癌細胞擴散。佢同個仔住埋同一間屋，但係身體弱到連睇住佢個仔玩都無

20140927

			力。我地成家人成日都諗辦法去照顧佢，等佢舒服啲。大家都好劫。我地都好彩，屋企咁多人，論住嚟做，有啲人屋企得一個人照顧，真係好辛苦。佢捱咗咁耐，到頭來都係無用，我地始終都要面對深愛嘅屋企人死亡。真係好傷心。
303.			<b>Scene 4.4 – 簽支票</b>
304.	倫	P	(拿公文到醫院，護士在旁，見到兄安在床上睡著，向護士細說) 姑娘，佢食咗飯未？
305.	護	D	食咗，你哥哥今晚好好胃口，食咗半碗飯，一大注菜，幾啖燉蛋。啱啱洽著之嘛。
306.	倫		唔該。(護士出。倫坐在床邊等安醒過來。不久，安醒。)
307.	安	K	阿倫，放工？(想坐起來，倫急急幫忙)
308.	倫		大哥。
309.	安		食咗飯未？
310.	倫		未。
311.	安		而家幾點？
312.	倫		八點半。
313.	安		成八點半你都未食飯？駛唔駛叫飯堂送啲野上嚟食？
314.	倫		唔駛，飯堂門咗。
315.	安		咁你要食野……
316.	倫		得㗎喇，我一陣番屋企食。姑娘話你今晚好好胃口。
317.	安		有咁靚嘅姑娘餵，咪俾面佢食多兩啖囉。(笑)
318.	倫		你劫唔劫？瞓吓先。
319.	安		我唔劫。
320.	倫		我帶咗支票簿。
321.	安		哦，好。(坐起身準備簽支票。倫將支票及筆提出，給安簽名。安簽完一張又一張，手及手指開始感覺麻痺，間中停下來郁動及按摩手指，一刻後)
322.	倫		係咪好辛苦？聽日先簽。
323.	安		唔好，簽多幾張等你有得用㗎嘛。(繼續

			簽，但很辛苦，一刻後)
324.	倫		嚟啦。(幫安按摩手及手臂。靜。一刻後安縮手)
325.	安		得喇。
326.	倫		聽日先再簽。(將支票及筆收起)
327.	安		辛苦你。
328.	倫		我唔辛苦。
329.	安		多謝。
330.	倫		做咩？
331.	安		多謝你照顧我。
332.	倫		咩呀？我地係兄弟嚟咁嘛。
333.	安		你成日跑嚟跑去，晚晚放咗工都嚟睇我，我知你好忙，日頭番工，夜晚讀 MBA，我覺得你好叻。
334.	倫		邊係？
335.	安		我講真。你照顧得我咁好，你係全家最聰明最叻個，讀得書又多...
336.	倫		叻乜鬼，我個 MBA 都無時間讀，我想唔讀.....
337.	安		千其唔好，你一定要讀，你有理想，你會做大事，你一定要繼續。你令我好驕傲，係真。(靜)應承我你要讀埋個 MBA。
338.	倫		我應承你。
339.	安		然之後就同你女朋友結婚。
340.	倫		呢樣無得應承，人地未必肯嫁俾我。
341.	安		唔係呱，你咁“炸”嘅？駛唔駛我過幾招俾你？呢度啲姑娘我全部都氹得好掂。
342.	倫		係呀，媯女你最叻。
343.	安		(笑)好夜喇，你肚餓，早啲番屋企食飯。
344.	倫		我聽日再嚟。
345.	安		你得閒先啦！
346.	倫		我聽日會嚟。早啲。(離開醫院房間，在門口站一會，回望安，見到安的手仍不舒服。一會兒倫離開，慢步向台的另一角，到快餐麵檔，叫一碗麵打包)唔該一個雲吞麵，油菜全走。(在等待中，電話響)喂？……係

			……我係 Allan……咩話？……點解會咁？… …我啱啱先去睇完佢……好好，我即刻番 嚟。（急出）
--	--	--	---

20140927

347.			<b>ACT 5 - 照顧機械 2</b>
348.	投影		照顧是……
349.			(演員反回 ACT 4 的位置，做同樣的動作，今次說以下的對白，是序幕“照顧是……”的下集。對白出時投影同時出。)
350.			照顧係疲乏、沮喪、痛苦。
351.			照顧係喜悅、原諒、滿足。
352.			照顧係學習接受及捨棄。
353.			照顧係全職工作、二十四小時隨傳隨到。
354.			照顧係無條件愛及支持他人。
355.			照顧係永遠做得不夠。
356.			(演員重複一次以上句子，走去另一個位置，形成照顧機械 2，他們繼續照顧動作。慢慢地，有如他們在一隻船上，被風拋來拋去。風開始大，有人站不穩跌倒，其他人支援。第二個人站不穩又跌倒，其他人又支援。第三個人又跌下來，又被其他人支撐著，六個人在風勢越來越大的情況下互相支撐，嘗試繼續做照顧工作，直至大家都支撐不住，一起跌下，疊成一堆。靜。慢慢，演員逐一脫開，只剩 Jack 一人)
<b>357.</b>			<b>Scene 5.1 – Jack 獨白 3</b>
358.			(音樂，LFX，舞者入。)
359.	Jack		<p>我同佢講我好鍾意佢，我太無耐性，覺得如果我唔同佢講我會後悔。//佢好理性咁同我講，我都好喜歡你，/不過只係作為一個朋友。//以前我成日講笑，玩埋啲爛 gag，製造氣氛，好有效架。/我地唔會問佢關於佢個病，只會睇佢個 website 度睇，佢一路都有 update 佢個 website，直至佢連 mouse 都用唔到。//佢面色越來越黑，越來越暗啞，佢身體越來越劫，越來越差。而我地大家都好驚，唔敢出聲，大家都唔想提呢件事。/</p> <p>最差嗰日就係知道佢走咗，我成個人崩潰。點解？點解會咁？前一日都收到電話話佢情況差啱喇，但係自己就選擇唔承認佢情況差咗，我真係無諗過第二日佢就走咗。/我覺得成個人好似俾人挖空晒咁，個腦好似癱咗，諗唔到野。//我需要一個自然嘅環</p>

20140927

			<p>境：海灘、公園，想睇下啲花草樹木，望吓個天，我唔想留啲石屎堆嘅地方度，喺屋企我會痴線， / 我甚至乎會想自殺。</p> <p>嗰時大家都好努力咁去扮堅強，大家都扮到無野咁樣，好幼稚好愚蠢，我地係一班 friend，應該有人帶頭去講吓呢件事，我地嗰陣大家都細，唔知道點樣去溝通去面對，大家都唔出聲。 / (音樂停，其他演員及舞者離開) 我個人開始慢慢靜落嚟，開始唔想講咁多野，啲爛 gag 都無效喇，講嚟做乜呢。嗰幾年，係一段係好黑暗嘅日子。</p>
360.			<b>Scene 5.2 – Eva 下午茶</b>
361.	Eva	W	(Eva 拿著幾個購物袋趕入，她與朋友約好下午茶但遲到了，她在餐廳內周圍望，尋找朋友們。) 唔好意思，要你地等咁耐。我頭先去買野。
362.	Bob	E	今餐一定係你請。
363.	Eva		無問題。
364.	Carol	D	嘩，咁多袋，你買乜野？
365.	Eva		我要幫 Amy 買個假髮。
366.	Carol		係？睇吓。(Eva 取出三個不一樣的假髮)
367.	Eva		我都唔知佢鍾意乜野款，咪買咗三個。噏，呢個係_____裝，呢個係_____裝，呢知係_____裝。
368.	Carol		佢呢排點？
369.	Eva		佢開始甩頭髮，成執成執咁甩，直情好似有人喺佢張床上剪頭髮咁，嚇到佢死。
370.	Bob	E	咁佢身體點？
371.	Eva		又劫又辛苦囉。但係佢又唔肯休息，激死我，佢仍然好似以前咁跑來跑去，我同佢講，「你要休息先會好啲，你為啲細路著想吓啦。」但係堅持乜都自己做。
372.	Carol		咁佢老公呢？
373.	Bob		仲有工人呢？
374.	Eva		我都係咁樣問佢，不過你知佢啦，乜都要自己做。我諗佢接受唔到自己身體變化。
375.	Carol		生完兩個細路，點可能唔變化吓。
376.	Eva		咁咪係囉，佢就係唔接受，我睇到都心痛。

20140927

377.	Carol		Amy 真係唔可以夾硬嚟，女人過咗四十，乜都走下波，到你接受咗身體開始差之後又更年期，佢真係要顧住自己身體。
378.	Bob		Eva，你都要照顧自己，你都喺度跑來跑去。
379.	Carol		係呀，你幫佢咁多，佢有你呢個 friend 真係好彩。
380.	Eva		佢初初由日本番嚟香港嗰陣，我真係成個超人咁，好似揸緊自動波咁，幫佢搵樓，幫佢個工人申請 visa 嚟香港，幫佢搵個司機，去國泰到安排用輪椅去接佢，寫 email 同大家 update 佢嘅狀況……
381.	Bob		我知，我都收到。
382.	Eva		我喺醫院陪咗佢四日，之後我覺得好似跑咗十個馬拉松賽咁，我“林”咗。後來先慢慢意識到：佢生 cancer，我先識得驚，係第一次我身邊同我一樣咁大嘅人面對……死亡，佢可能會死，我真係驚，但係又唔可以俾佢知，喺佢面前又要堅強，我成日同佢講：「你唔會有事。」可能呢句說話我係自己同自己講。
383.	Carol		佢發現得早，又即刻去醫，一定無事，如果佢拖，咁就未必咁好彩。
384.	Bob		係呀，生 cancer 係要即刻處理，搵到適合嘅治療就要早啲對付。Carol 講得啱，Amy 一定無事。不過你都唔可以同佢負擔咁多，你有自己嘅生活。
385.	Eva		我知，我有老公，我嘅生活喺 New York……睇住佢咁樣唔照顧自己……唉，我都唔勸得咁多。
386.	Carol		做朋友係有限度，有啲野係管唔到，你都盡咗力幫佢。
387.	Bob		係吖，你改變唔到佢。
388.	Eva		唉，我覺得，做咗咁多都未做得夠。
389.	Carol		佢唔肯改你駛乜責怪自己？呢啲係佢嘅決定。
390.	Bob		你要照顧自己。
391.	Eva		我知。好彩我有班好似你地咁嘅好朋友，肯聽我訴苦，支持我。
392.	Carol		仲有你老公。

20140927

393.	Eva		係，佢一直都好支持我，又聽我講，又陪住我喊，仲揸車周圍車我。哎呀，幣喇！我唔記得佢仲係架車到等我，死喇，快啲 call 佢先得。
394.	Carol/Bob		吓？ / 你連老公都唔記得？ / 咁都得……
<b>395.</b>			<b>Scene 5.3 – 換尿片 2</b>
396.	Stephen		我哋無機會同阿媽講再見，不過阿爸過身嗰陣時我哋就係佢身邊。佢好唔捨得我哋，我見到佢咁辛苦我同佢講：“爸/媽，你點呀？”佢望住我，用手指指住我話：“你點呀？”我捉住佢個隻好細嘅手，我細細聲喺佢耳邊度話：“爸/媽，無事，你放心走，我地會好好。”佢終於都放心走。多謝你做我阿爸/媽。  我同啲妹傾好，十年後我哋幫阿爸/媽執骨，風水好冇嘛，但係到咗十年期我地又改變主意。
397.	Sally		(Sally 及 Susan 入) 阿爸都死咗咁耐，就俾佢安息，唔好攞佢啦。
398.	Susan		真係煩，我地唔係講好咗咩？
399.	Sally		好好地做咩事要掘番出嚟？仲有，咁樣執一執要幾錢？(Sally 及 Susan 繼續無聲爭執)
400.	Stephen		(向觀眾) 點解我要將佢掘返出嚟？我都唔知，又要咁多錢，真係唔係好實際，不過如果我哋唔做，我覺得好似有啲嘢未做完，未做好，未做得夠咁嘅。我地啖咗成年半，我阿爸/媽都死咗十二年。
401.	Sally		你揸主意喇。
402.	Stephen		(向觀眾) 咁我就安排叫人動土。(所有人移到台上另一角“墓”，一名執骨專家在驗屍，Stephen 眼定定望著屍體，有些兄弟不敢望)
403.	專家		睇吓先。哦，好乾淨喎，你睇，啲骨幾乾淨。
404.	Stephen		(震驚地) 嗰條係咪尿片嚟㗎？
405.	Sally/Susan		咩話？ / 阿爸仲著住尿布？ / 有無攞錯？ / 點會咁㗎？
406.	Stephen		師傅，唔該你攞咗佢。(專家將尿布扔掉，再搜查一刻) 唔該你幫我地執好啲，等我阿爸舒服啲。



407.	Sally		阿爸在生嗰陣你換片咁啱，佢死咗之後你就換的咁叻。
408.	Stephen		我終於明白點解要執骨，阿爸想俾多個機會我幫佢換尿片，等佢可以瞓得舒服啲。

20140927

409.			ACT 6 – 體會
410.	投影		體會
411.			(演員穿全黑，他們站在一起，很接近，有如成為一體)
412.		W	我俾自己好多壓力。
413.		D	我覺得好內疚，好遺憾。
414.		K	我唔識點樣幫佢地。
415.		W	無人幫我手，我好沮喪。有時我只係想有人幫我煮一餐住家飯。
416.		P	我知做得唔夠好，你唔駛提我。
417.		L	我以為我可以一個人做晒。
418.		D	我好想做得更多。
419.		E	(投影慢起：手) 我地只係可以握住佢隻手，係咁多，仲有乜野可以做？我地安慰佢，講好多大話，我覺得最差嘅大話係：「等你好番嗰陣我同你去邊度邊度……」而我地大家都知道係唔再會“好番”，呢個係最殘忍嘅大話。
420.		L	(向觀眾席某方向) 你帶嚟咁多病痛同死亡，你係魔鬼。
421.		P	(向同一方向。投影：鐵線困著的鳥) 你喺我地社會存在，好似一隻雀仔被鐵線綁住咁，佢不停掙扎，始終都會死，你係吸血鬼。
422.		K	你真係可憐，無人喜歡你。
423.		D	你係天使。
424.		P	點解？
425.		D	因為佢令我全家親近起嚟，如果唔係佢，可能我地關係唔會咁好。
426.		K	你係一種自然挑選，只有最強壯嘅先會生存。
427.		W	俾多個機會我，我可以做得更好，可以生活得健康啲。
428.		K	我有無選擇錯誤？我嘅壓力好大。
429.		E	我日日都好驚，半夜三更最驚就係個電話響。
430.		D	我身邊無人了解我，無人了解我嘅需要，我

20140927

			嘅痛苦，我嘅絕望，無人。
431.		P	你最錫嘅人有病，佢地可能會死。人生真係好無常。
432.		L	生命好短，要活在當下。
433.		D	你要原諒，原諒他人又要原諒自己。我地好嘅時間，點解我要等到有人病先去同佢和好？（到這時，其他演員已穿回自己主要角色的服裝）
434.	主持人 (VO)		咁經過咁多事之後，你有乜野體會？
435.	萍		（演員現在已站成半圓形，有如序幕時的一樣，不過距離近多了）講番自己嘅故事令我記番起當時我地幾無助。雞仔餅嗰件事過咗無幾耐，我妹妹就過咗身。經過咁多事，做咗咁多野，我地都係要失去佢。不過我好慶幸我身體仍然好好，我可以享受人生，為自己嘅人生旅程準備。
436.	Eva		我朋友 Amy 番咗日本。而家我先知道我好好彩，我仲健康，我屋企人又健康，我有個好錫好支持我嘅丈夫，我要提醒自己，要放鬆，搵時間去照顧自己。
437.	Jack		我第一次將呢件事話俾能人知，我喊得好勁，我嘅情緒令我啜住咗，唔可以完全將件事講晒出嚟。後來我釋懷，承認呢件事發生過，講完之後嗰一排我成個人鬆晒，好似脫咗壳咁，爆開咗，重新認識過自己，之後每次講故事一次比一次容易。有一樣野我學到嘅係同理心，我發覺之前我係無嘅，同埋我明白到，鍾意一樣野唔係一定要擁有佢，就算擁有咗都一樣可以失去。
438.	Stephen		我因為唔識照顧我爸爸，內疚咗好多年，覺得自己好無用。當我終於寬恕自己嘅時候，簡直係放下心頭大石。其實我地都係人，有啲野做得好叻，有啲野做得唔叻，好自然啫。如果我地了解自己，乜野做得叻，或者我地會知道邊一方面需要幫手，咪去搵人幫手囉，其實搵人幫手有咩問題啫？或者咁樣我地無咁大壓力。
439.	Jenny		睇住我阿爸同我細佬化解佢地嘅恩怨令我覺得溝通係好重要。千祈唔好等到最後一刻，好彩當時我細佬及時番嚟，最後可以送我阿爸一程。我阿媽同我而家關係仲好過以前，

			而家我地好似朋友咁，我地日日都傾電話。
440.	Paul		我都覺得溝通好重要。我睇住我阿媽受痛苦，但係佢又唔肯出聲，所以我都唔識幫佢。其實我地都需要輔導，我地做照顧者嘅，喺感情上都唔識得點去幫啲病人。我阿媽走咗之後，我同我阿爸關係好咗好多，我地而家多野傾咗，逢星期日都去食 lunch。
441.	Eva		係咪食 buffet？
442.	Paul		有時啦。
443.	主持人 (VO)		<p>今日好開心可以見證大家嘅分享，我希望大家繼續分享你嘅故事，因為你嘅分享可以帶俾其他人好多智慧同安慰。更希望今日對大家嚟講係一個有得著、有收穫嘅分享。好喇，今日嘅分享到此為止，再次多謝大來臨，希望我地好快再有機會見面。拜拜。</p> <p>(演員開始分散，大家都拿起自己的私人物件出，有些一齊離開，有如失散多年的好友一樣，最後一個人離開時在台上再望一刻才離開。投影：彌補心路程，支援癌病照顧者，期待你的分享。燈暗。Music fade out.)</p>
444.			完